

KIRBEPREDIGT 1983

Ihr liebe Leut', jetzt horchet na,
dass I mei Predigt halta ka.
Wia jedes Johr, so sollt Ihr erfahra,
was em letschta Johr für Tata wara.
Mr ka net emmer saga, so isch es halt, ha no!
Mir Kirbe-Buba saget OOh – OOh – OOh!

Em letschta Johr war Schulteswahl,
Ihr werdet's no wissa,
dui Zeit war rom vom Schultes, ond nex verschlissa.
Er war alloi als Aspirant,
koi Gegner weit ond breit em Land.
Sai schaffa, des war lobenswert,
er hat net bloß ons're, sondern au d' Kassa
vom Staate g'leert.

Dui Mauer ond dia Hochwasserwäll' wurdet
eigweiht, mit viel Lab und Gesänge.
Dr oizigscht, der sich do dra net hält isch dr
Neckar, der haut weiter über d' Stränge.
Dreimol musstet heula wega Hochwasser,
dia arme Kicker,
fascht wäret ehne rausg'falla ihre Auga-Klicker.
Des Turnier, des hät os g'falla,
musste wega Schlamm ausfalla.
Doch just, do kam dem Vordermeier ond dem
Oberst die Idee,
spiela mer en Höpf'ga ond s' zählt en Benninga,
no isch nex he.

Derzeit hen no durchg'setzt dia zwoi Schlümpf,
nochmal des Turnier 19-hondertachtzig-ond-fünf.
Ond wenn dann isch der neue Platz soweit,
Leut geiht dees a Fescht oos alle freit.
Nach 15 Johr warta, drei Johr Bauzeit, isch mr froh,
mir Kirbe-Buba saget OOh – OOh – OOh!

Die Benninger kennet's mit de Verei' au net lau,
jetzt gibt es zwoi mit dene Wau-Wau.

Wia hend die g'stritta ond bald Fenger g'schriebe wond,
alles wega dene Hond.
Es war a Hickel ond a Hackel,
wega dene Schäfer-, Boxerhond bis na zom Dackl.
Vorbei die Eintracht ond au soo...
mir Kirbe-Buba saget OOh – OOh – OOh!

Dui Neckarbrück isch au a Übel,
früher hat mr g'sagt „machtet doch dapfer ihr Triabel“.
Doch dui Statik wurde erst erstellt,
als mr scho über dui Brück hat wieder g'wellt.
Wenn dui fertig isch so anno... send mr alle richtig froh.
Doch mir Kirbe-Buba kennet bloß saga OOh – OOh – OOh!

Dia Wengerter, die kennet guat lacha,
ausgäh hat's, ond no guata Sacha.
Bloß ois, des brengt se jetzt ens Schwitza,
hoffentlich bleibet se bei dene hohe Preise ihre
Weila sitza.

Der Limes war a Mauer von de Römer,
a echter Benninger kennt se, ond des wois jeder.
Au solche, welche hent Büchle g'lesa,
ond send en oserm Museum g'wesa.
Dui Neuzeitmauer war jedoch,
selb'ge mit dem ronda Loch.
Sie stand em Weg, jetzt heidenei,
beim Straßenbau zom Luag drei.
Em Rätehaus hat mr lang beraten,
es half nichts, man ging bis hin nach Baden.

Es kamen von dort die hohen Richter,
was blieb, es waren lange Gesichter.
Zu guter End war keiner froh,
mir Kirbe-Buba saget OOh – OOh – OOh!

Männer, fasset jetzt a den Sarg,
heulet ond flennet nochmacl stark.
Zu Ende geht dui Kirbe-Buba-Zeit,
uff dui sich der Jahrgang 64 heut scho freut.

Mir wenschet, dass niemand eischränkt onser Traditio,
sonsch miast mer heut scho saga OOh – OOh – OOh.
Mir lasset na den Sarg end Neckarfluta,
verbrenna dean mir Kirbe-Buba,
dui Kirbe mit em a groBa Knall,
drom liabe Leut, jetzt folget os all.

Verkünden werdet die Raketa nun,
dui Benninger Kirbe wird jetzt ruh'n.

AMEN